

## ALAHADY faha-4 PAKA - TAONA B



*“Izaho no mpiandry ondry tsara,*

*sady mahalala ny ahy Aho no fantatry ny Ahy” (Lk 24, 35-48)*

Ry Kristianina havana, mbola ao anatin’ny fankalazana ny Paka tanteraka isika ary raha mahatsikaritra isika mba hivelomantsika izany hafaliana lavorary vokatry ny fiadanana atolotry ny Paka amintsika izany ka itoerantsika ao amin’i Jesoa sy itoeran’i Jesoa tafatsangan-ko velona ao amintsika dia atolotry ny Eglizy isaky ny Alahady ny toetran’i Jesoa ho fankaherezana antsika hiroso lalindalina kokoa eo anivon’ny fiainana hizara ny hafalian’ny Paka.

Ny Alahadin’ny Paka dia nankalazantsika i Jesoa Aina izay nitsangan-ko velona ka velona ao aminy isika.

Ny Alahady faharoa ny Paka dia nankalazantsika ny I Jesoa Famindrampo, na inon-kidona na inon-kiatra dia tia antsika Andriamanitra satria efa nitia antsika hatramin’ny voalohany ka mamindra fo izy ary i Jesoa no endrik’izany famindrampo izany.

Ny Alahady fahatelo dia nankalazantsika i Jesoa Aina sy Famindrampo izay tsy lavitra fa velona eo anivontsika sy miara-dalana amintsika. Tsy hoe mino matoatoa isika fa

velona tokoa izy, olombelona fa tsy matoatoa no arahintsika dia i Kristy ka mahatonga antsika ho Kristianina.

Amin'izao Alahady fahaefatra ny Paka izao kosa dia i Jesoa Mpiandry ondry tsara no banjinintsika. Izany no mahatonga antsika sy ny Eglizy eran-tany hibanjina manokana momba ny fiantsoan'Andriamanitra. Raha mibanjina izany isika dia matetika tonga ao an-tsaintsika voalohany ny pretra sy ny relijiozy. Tsy mahagaga izany satria miezaka izy ireo hanahaka ny fiainan'i Jesoa amin'ny alalan'ny voady sy ny fanokan-tena ka mahatonga antsika mahatsiaro manokana ny fiantsoan'Andriamanitra. Mivavaka isika mba hanahaka an'i Jesoa tokoa izy ireo, mivavaka isika mba hanana pretra masina, pretra mitoetra tanteraka ao amin'i Jesoa sy itoeran'i Jesoa ka mamokatra ny fiainany sy ho vavolombelona manahaka an'i Kristy tokoa izy ireo. Enga anie ireo voatokana relijiozy lehilahy sy vehivavy hanahaka ny fitiavan'i Jesoa ka hanolon-tena amin'ny fanehoam-pitiavana amin'ny toerana rehetra anirahana azy.

Tsarovy ry Kristianina havana fa raha mivavaka ho an'ny fiantsoan'Andriamanitra isika dia mivavaka koa ho an'izay vita batemy rehetra mba ho Apôstôly satria irak'i Kristy eo anivon'izao tontolo izao ho fanasina sy fahazavana ho an'ireo manodidina.

Izany rehetra izany no hivavantsika amin'izao Alahady faha-4 ny Paka izao ankalazantsika an'i Jesoa mpiandry ondry tsara.

Mitodika amin'ny fiantson'Andriamanitra isika androany satria mankalaza an'i Jesoa mpiandry ondry tsara ka ho fanahafana ny fiainan'i Kristy bebe kokoa ny famaliana ny antsony. Banjinintsika àry i Jesoa mpiandry ondry tsara ilay mahafoy ny ainy.

Antsoina mpiandry ondry tsara i Jesoa satria mahafoy ny ainy, izy ihany no manambara an'izany ary anisany kriterana izany fahafoizan-tena izany. Raha te hanorina Eglizy trano isika, Eglizy Olona Velona dia ilaina ny fahafoizana tahaka an'i Kristy. Tamin'ny alalan'ny fahafoizana no nanavotan'i Kristy antsika ary maro ny fahafoizana nataony ho fanorenana ny Eglizy Fianakaviana vaovao naoriny: tamin'ny alalan'ny asa fitoriana, fampianarana, tamin'ny fanomezana sakafo ny vahoaka marobe nanaraka azy tany an'efitra, tamin'ny famantarana maro samihafa no nentin'i Jesoa manambara ny fahafoizana.

Anjaram-piainantsika Kristianina ny hanana fahafoizana koa, nambaran'i Jesoa ny mifanohitra amin'izay, ny mpiandry ondry ratsy vao mahita ny amboadia dia mamela ny ondriny ka mandeha amin'ny toeran-kafa. Aoka isika ho tahaka an'i Jesoa, izy no mpiandry ondry tsara, aoka isika tsy hamela ny ondrintsika fa hahafoy tena ho azy ireo.

Manontany tena isika ankehitriny aiza amin'ireo ambaran'i Jesoa amin'ny evanjely no misy antsika , ilay mpiandry ondry tsara ve sa mpiandry ondry ratsy, sao dia ray na renim-pianakaviana tsy miaro na mikolokolo ny zanaka isika fa indrindra amin'izao andro sarotra izao ? sao isika pretra na relijiozy, eveka manararaotra mitady ho an'ny tenany samirery mihinana ny ondriny matavy ? tsara ho dinihina izany amin'izao andro

fankalazana ny mpiandry ondry tsara izao, miantso antsika i Jesoa hanahaka azy, miantso antsika ny Eglizy. Sao àry mamela ny hafa eo ambany maso atao ampihimamba, hosohosehina ny maha izy azy tsy mijery ny rariny fa faly amin'ny fahafinaretana isankarazany ka adino ny maha mpiandry ondry tsara.

Isika rehetra no tsy maintsy mandinitena ka mihavao amin'izao Paka izao ary manana modely isika izay vao nankalazaintsika ny fanambarana azy olontsambatra dia I Lucien Botovasoa izay nahafoy sy nanolotra ny ainy. Azo lazaina fa lahika votom-pinoana, nanahaka an'i Jesoa mpiandry ondry tsara i Lucien Botovasoa, tsy nilaozany ny ondriny na dia afaka nandositra aza izy fa niverina nanongana azy ireo, niara-nivavaka ho an'ny fandriampahalemena sy fifankatiavana. Tsy natahotra izy nanolotra ny ainy ho fanavotana ny maro.

Aoka isika hivelona ny maha mpiandry ondry tsara ka hikarakara azy avy. Samy manana ny ondry karakarainy isika tsirairay avy na ny papa, na ny eveka, na ny pretra, na ny relijiozy, na ny mpanabe, ny mpampianatra, ny manam-pahefana isan-tokony fa indrindra ny Mpitondra eo amin'ny firenena sy amin'ny faritra.

Misy kriterana nambaran'i Jesoa koa miampy ny fahafoizan-tena dia ny fahalalana ny ondriny araka ny voalazany sady mahalala ny ondriko aho no fantany ondriko. Izany no maha mpiandry ondry tsara satria misy fifandraisana lalina eo amin'ny mpiandry ondry sy ny ondry, mifankafantatra tsara ka na ny feo aza dia fantatra. Ny teny hoe mahalala ao amin'ny Baiboly dia fananana fifandraisana lalina tsy hoe mahafantatra ankandrina izany fa miditra amin'ny tena fiainana, fanaovana traikefa ny fitiavana misy. I Jesoa dia mahalala antsika tsirairay ka izany no maha mpiandry ondry tsara azy. Aoka isika amin'ny andraikitra ananantsika hahalala ny ondrintsika, vokatry ny fifandraisana tsara izany ka takina amintsika rehetra mpiandry ondry tsara na ray sy renim-pianakaviana izy na relijiozy na pretra na eveka na olona manam-pahefana.

Ny fahatelo dia ny fiezahana hampivondrona ireo ondry ao anatin'ny vala tokana, izany hoe mpampiombona sy mpampihavana tahaka an'i Jesoa. Nanolorany ny ainy dia ny fahafantarany antsika ka ny tanjony dia ho olo araiky ao aminy isika.

Izany koa ny fiainan'i Lucien Botovasoa, nahalala tsara ny olona tao Vohipeno izy no fantatr'izy ireo koa. Rabefihavanana no niantsoana azy. Làlana tsy maintsy harahintsika koa izany fa indridnra isika manana andraikitra eo amin'ny fiaraha-monina, ny ray sy renim-pianakaviana, ny mpampianatra, ny mpanabe, ny mpitondra.

Manamafy izany ny voalaza ao amin'ny vakiteny voalohany : matoa mpiandry ondry tsara ilay voalazan'ny Mpaminany ary tanteraka tokoa satria ny anaran'i Jesoa no mampiombona antsika ka hahazoantsika ny famonjena ary efa natolony antsika rahateo ny ainy. Io no fahefana mampiavaka an'i Jesoa, fahefana mitondra famonjena fa tsy fahefana mamoritra na manapotika na manongona araky ny hevitr'izao tontolo izao. Ny fahefan'izao tontolo izao dia ho entina manongona, ho entina hahazoana

harena hanapotehana ny hafa. Tsy fahefana tahaka izany ny an'i Jesoa fa nahafoy ny ainy izy, tò teny izy ary mampiombona antsika sy hahazoantsika ny tena hasambarana. Mananatra antsika i Md Joany ao amin'ny vakiteny faharoa hanahaka an'i Jesoa ka hahita azy araka ny tena toetrany. Matoa isika manaraka an'i JESOA dia mba hahalala ny tena toetrany ary manampy antsika izy ka hahalala ny toetra maha zanak'Andriamanitra antsika sy hiaina an'izany amin'ny fiainantsika andavanandro, ho tena mpiandry ondry tsara tokoa isika.

Ry Jesoa Kristy zokinay ô, ianao tokoa no tena mpiandry ondry tsara ka mahalala anay ary izany ny fanantenana sy antoka ho anay amin'ity fiainana ity. Mangataka aminao izahay ampio ireo manara-dia anao akaiky dia ny papa, ny eveka, ny pretra mba omenao ny tena finoana tokoa ka hitoetra tanteraka ao aminao izahay sy itoeranao ka hamokatra be amin'ny fahafoizan+tena eo amin'ny fiainanay andavanandro.

Toy izany koa ireo mpitondra rehetra ara-nofa fa indindra ireo tompom-pahefana mba ho ilay fahefana tò teny ka hitarika ny vahoaka amin'ny vala tokana.

Ireo mpitondra anay hitsilovan'ny Fanahinao Masina ka hahay hikatsaka mandrakariva ny soa iombonana, ampio izahay mba hahery fo tahaka an'i Piera sy Joany ary ireo Apôstôly, tahaka an'i Lucien Botvasoa mba tsy hatahotra izahay fa hanohy ny asan'i Jesoa mpiandry ondry tsara amin'ny toerana misy anay ka ho fanasina sy fahazavana izahay sy ho taranaka mpanorina tokoa izahay, manorina Eglizy trano sy Eglizy olona velona fa indrindra amin'izao fiomananay amin'ny filan-kevitra pastoraly izay handalinanay ny fanorenana ka mba ho mpiandry ondry mitondra ny olona rehetra eo amin'ny vala tokana tokoa anie ny fiainanay andavanandro, hahaizanay mampitraotra ny finoana sy ny fiainana andavanandro. Amen

Mompera Arseveka Mgr Benjamin Ramaroson